

Hvala Allahu, Gospodaru svjetova! Salavat i selam neka je na Allahova poslanika, Muhammeda, s.a.v.s., njegovu porodicu, ashabe i sve one koji ga slijede na putu islama!

Poštovana braćo i sestre, draga djeco i omladino, esselamu alejkum!

Uzvišeni Allah u 183. ajetu sure El-Bekare, kaže:

„O vjernici! Propisuje vam se post, kao što je propisan onima prije vas, da biste bili bogobožni.“

Možda ste na osnovu ovog ajeta pomislili da će danas biti govora o postu jer nam se veoma približio mubarek ramazan, ali to ipak neće biti slučaj. Govorit ćemo o zadnjoj riječi ovog ajeta, odnosno, o onome što bi trebao biti rezultat našeg ramazanskog posta – bogobožnosti.

Ako bi željeli definirati takvaluk ili bogobožnost, onda bi njegova najjednostavnija definicija bila: „*Takvaluk je strah od Uzvišenog Gospodara, u smislu pridržavanja propisa, zadovoljstva sa onim što je čovjeku određeno od nafake i spremnosti za Dan polaganja računa.*“

Također bi se mogala definirati i sljedećim opisom: „*Bogobožnost je činjenje svega onoga sa čime iskazujemo svoju pokornost Allahu, dž.š., po Njegovoj uputi (tj. po odredbama Kur'ana i sunneta), želeći time Njegovu nagradu i*

ostavljanjem nepokornosti prema Njemu iz straha od Njegove kazne.“

Džennet sa svojim neopisivim ljepotama je pripremljen upravo za bogobožne, što potvrđuje 45. ajet Sure El-Hidžr: **“Oni koji budu bogobožni, oni će u džennetskim baščama, pored izvora, biti.”**

Uzvišeni Allah podstiče ljude da žure oprost od Njega i Džennetu, pa u 133. ajetu Sure Ali Imran, kaže: **“I požurite ka oprost od Gospodara vašeg i Džennetu koji je prostran kao nebesa i Zemlja, pripremljen za bogobožne.”**

Prenosi Ebu Hurejre, r.a., da je Poslanik, s.a.v.s., kada je bio upitan šta će najviše ljude uvesti u Džennet, rekao: **“Takvaluk i lijep ahlak.” Pa je upitan o tome šta će ljude najviše uvesti u vatru, pa je rekao: “Jezik i stidno mjesto.”** (Tirmizi)

Prenosi Ebu Zerr, r.a., da ja Allahov Poslanik, s.a.v.s., rekao: **“Boj se Allaha gdje god da si! Poslije lošeg uradi dobro djelo koje će poništiti loše i sa ljudima se ophodi na najljepši način.”** (Tirmizi)

Kada bi Poslanik, s.a.v.s., slao nekog emira, pratio putnika, držao hutbu ili vaz, preporučivao je bogobožnost. Kada ga je Ebu-Seid el-Hudri, r.a., zamolio da mu nešto oporuči, rekao mu je: **“Budi bogobožan, jer je u tome svako**

dobro!” (Ahmed).

Jedne prilike je Poslanik, s.a.v.s., držao dirljiv govore od koga su ustreptala srca i zasuzile oči, pa su mu rekli: **“Kao da ti je ovo posljednji govor, pa nam nešto oporuči”. Rekao im je: “Oporučujem vam bogobožnost, poslušnost i pokornost.”**

Ashabi, tabiini i njihovi dobri nasljednici svoja pisma i hutbe započinjali su pozivom na bogobožnost. Oni su bogobožnost jedni drugima preporučivali u različitim situacijama, pa i u svakodnevnom govoru i druženju.

Osnova straha jeste da čovjek uvijek strepi da ne padne u ono čega se boji i da se čuva svega što vodi onome čega se boji. Na drugoj strani, strah roba od svoga Gospodara ogleda se u činjenju dobrih djela koja će ga spasiti od kazne ili srdžbe, bivajući pokoran naredbama i ustežući se od nepokornosti. U potpunu bogobožnost spada izvršavanje obaveza i ostavljanje zabranjenih stvari i sumnjivih djela, a poslije toga u to spada i činjenje pohvalnih, a ostavljanje pokudenih stvari. Dokaz da ostavljanje sumnjivih stvari spada u takvaluk jesu Poslanikove, s.a.v.s., riječi koje prenosi En-Nu'man ibn Bešir, r.a.: **„Halal i haram su jasni, a između njih su sumnjive stvari koje ne raspoznaje većina ljudi. Tko se bude čuvao sumnjivih stvari, on čuva svoju vjeru i čast, a**

onaj tko upadne u sumnjive stvari je kao čoban koji čuva stado oko međe, pa gotovo da pređe u tuđe. Svaki vladar ima svoju zaštitu, a Allahova zaštita na Zemlji su zabranjene stvari. U tijelu ima jedan organ, koji ako je zdrav, zdravo je cijelo tijelo, a kada se razboli, razboljelo se cijelo tijelo; to je srce!“ (Buharija)

Mnogi ljudi danas rade sumnjive stvari i nimalo se u tome ne ustručavaju. Oni se ne osvrću na savjete drugih, bahate se i ohole te u svome sljepilu govore: *“Neka ljudi pričaju šta hoće. Mene nije briga za ono što pričaju, jer sam dobar i znam šta radim.”* Ovakvo razumijevanje života i ovakvo ponašanje je za vjernike nedopustivo, jer je čuvanje časti obaveza svakog muslimana.

Obaveza svakog muslimana je da se čuva sumnjivih stvari i da uvažava savjete muslimana.

Evo kako je mudri Ebu Hurejre, r.a., kada je upitan od jednog čovjeka o takvaluku slikovito pojasnio što je takvaluk. Rekao je: *„Jesi li kada išao putem na kojem ima trnovitog rastinja?“* Odgovorio je: *„Da.“* Upitao je: *„Kako si postupio?“* Odgovorio je: *„Kada vidim trnje odmaknem se, zaobiđem ga ili ga preskočim.“* Rekao je: *„To je takvaluk!“*

Dakle, takvaluk je način i stanje u kojem vjernik izbjegava šejtanske zamke, odnosno, grijehenje

koje je ovdje Ebu Hurejre, r.a., slikovito predstavio kao trnje.

Braćo i sestre! Budimo od onih koji su bogobojažni, kako bi zaslužili Allahovu, dž.š., milost!

Uzvišeni Allahu, molimo te, ne iskušavaj nas sa onim što nećemo moći podnijeti, daj da budemo od Tvojih bogobojažnih robova, oprosti nam grijeha i uvedi nas u Džennet!

Amin!

Prethodne hutbe potražite na našoj stranici: www.medzlis-split.org

Pripremio: Vahid ef. Hadžić

Split, 12.05.2017.

